

grand Vicaire; Mais il n'a pû que par violence nous chasser de Nostre Mission de Chikag̃a, et nous esperons que Monseigneur de Quebec ne souffrira pas vne telle violence si prejudiciable a son autorité; et que si vostre Grandeur veut bien luy en parler, il rétablira et confirmera le P. Pinet dans sa Mission pour y continüer ses fonctions qu'il á si heureusement commencé.

Au reste, ie ne dois pas attendre que le beau ciboire dont vostre Grandeur fait present a la Mission des Illinois, soit fait, pour l'en remercier au Nom de ces pauures sauuages; C'est vostre Mission, Monseigneur, puisqu'elle est sous la protection de L'Immaculée Conception de Nostre Dame, que Vostre Grandeur á choisi pour le jour de son sacre, et qu'elle á prise pour la Patrone de tout son diocese; Et le Pere Marquette ne pouuoit rien faire de plus conforme á L'intention de Vostre Grandeur, que de mettre la Mission des Illinois sous la protection de L'Immaculée Conception de Nostre Dame; Et quoyque vous ayéz toujours esté le pere de toutes nos Missions, celle cy, Monseigneur, vous doit estre attachée tout particulierement, et parceque c'est la Mission de L'Immaculée Conception de la Vierge, et par le beau present que vous luy faites. Ne doit'on pas croire que le Ciboire que Vostre Grandeur luy donne, est d'vn grand prix, puisqu'il faut fondre toute sa vaisselle d'argent pour le faire? Aussy nous sera t'il infiniment precieux, et nous ne pourrons rien auoir dans nos Missions, que Nous estimons d'auantage. Vne escuelle qui vous auoit seruj si long tems, Monseigneur, Car c'est lá toute